

23.2 RAPPORT VAN DIE DEPUTATE VIR DIE UITGEE VAN DIE ALMANAK (Artt 119, 277)

- A. Ds W Vogel lewer die Rapport.
- B. **Besluit:** Die Rapport word verwys na Kommissie Publikasies en Media.
- C. Ds AP Kruger rapporteer namens die Kommissie Publikasies en Media.

D. RAPPORT

1. Opdrag

Kyk Acta 2006:754

- 1.1 Die *Almanak* word weer uitgegee en 'n redaksie moet aangewys word (*Indien moontlik, moet die Redakteur een van Potchefstroom se predikante wees*) met die opdrag om:
 - 1.1.1 Die *Almanak* met dagstukkies uit te gee
 - 1.1.2 Die Voorsitter van die diakonie van elke kerk se besonderhede word ook gepubliseer. Ouderlinge en diakens se name word behou.
 - 1.1.3 Te kyk na moontlikhede van intensiewer bemerking van die *Almanak* om sodoende die publikasie in soveel moontlik huise beskikbaar te stel en 'n moontlike Engelse mark te ontgin.
 - 1.1.4 Die moontlikheid te ondersoek om die *Almanak* ook in Engels te laat druk en op die Gereformeerde Kerke se Webblad beskikbaar te stel. Hierdie versoek is nie net gemotiveer in die lig van Internetgebruikers se behoeftes nie, maar ook van anderstalige lidmate van Gereformeerde Kerke.
 - 1.1.5 Die moontlikheid te oorweeg om 'n oorkoepelende Deputategroep saam te stel vir Publikasies sodat daar voortdurend oor gemeenskaplike sake soos byvoorbeeld Finansies gehandel kan word.
 - 1.1.6 Statistiese tabelle te verander om 'n meer statisties kontroleerbaar, 'n roepings verantwoordbare (soos bv vordering in die vervulling van die missionêre roeping van die kerk) asook 'n gebruikersvriendeliker profiel van getalle in die Gereformeerde Kerke weer te gee. Vir die doel is die versoek dat Prof Faans Steyn van die Statistiese Konsultasiediens aan die Potchefstroomkampus van die Noordwes-Universiteit, op die Redaksie van die *Almanak* benoem moet word.
 - 1.1.7 Administratiewe inligting meer vaartbelyn te maak.
 - 1.1.8 Dit word aanbeveel dat die kategorie "opgeneem" in die toekoms verdeel sal word in "opgeneem uit ander kerke" en "opgeneem na evangelisasie".
 - 1.1.9 Die Deputate ondersoek die moontlikheid om dagstukkies vir die tiener-, studente- en werkende jeug te publiseer.

Besluit: Kennis geneem van 1.1 tot 1.1.9.

2. Sake waarvan die Sinode moet kennis neem

- 2.1 Die *Almanak* het jaarliks verskyn (vgl Opdrag 1.1).
 - 2.1.1 Die *Almanak* het jaarliks verskyn met dagstukkies. Die Deputate wil graag aan die Sinode rapporteer dat die *Almanak* met dagstukkies in die lig van korrespondensie wat ontvang is, en volgens die beskeie oordeel van die Deputate, baie goed ontvang is in die kerkverband en daarbuite. Die Deputate wil ook graag 'n woord van besondere dank uitspreek teenoor al die predikante wat op 'n besondere wyse saamgewerk het om van hierdie publikasie 'n sukses te maak (vgl Opdrag 1.1.1).
 - 2.1.2 Die Voorsitter van die diakonie van elke kerk se besonderhede is gepubliseer. Ouderlinge en diakens se name is nie geplaas nie. Daar was 'n versoek dat die lettertipe van die dagstukkies groter gedruk moet word en dat die dagstukkies een op 'n bladsy geplaas word. As gevolg hiervan het die drukkoste verhoog en is daar na aanleiding hiervan 'n skrywe aan elke Kerkraad gestuur vir 'n meningspeiling of die name van die ouderlinge en diakens gepubliseer moet word. Uit die meningspeiling het gewys dat die name weggelaat kan word. Die Deputate het besluit dat die name

- wel aangevra word en dat die statistiekvorms na 'n tydperk na die argief gaan vir bewaring indien persone hieroor navorsing wil doen (vgl Opdrag 1.1.2).
- 2.1.3 Intensiewe bemerking is gedoen deur die stuur van plakkate aan Kerkrade en onderskeie instansies. Die ontginning van 'n Engelse mark blyk 'n baie duur proses te wees. Sinode Middellande se inligting is in Engels agterin die Almanak geplaas (vgl Opdrag 1.1.3).
- 2.1.4 Die moontlikheid te ondersoek om die Almanak ook in Engels te laat druk en op die Gereformeerde Kerke se Webblad beskikbaar te stel. Hierdie versoek is nie net gemotiveer in die lig van Internetgebruikers se behoeftes nie, maar ook van anderstalige lidmate van Gereformeerde Kerke (vgl 2.1.3).
- 2.1.5 'n Lid van die Deputate Almanak het op gereelde grondslag die vergaderings van die Deputate Publikasies bygewoon. Die Deputate Almanak het ook finansiële bydraes gemaak aan *Die Kerkblad* en *Slingervel* (vgl Opdrag 1.1.5).
- 2.1.6 Statistiese tabelle is in samewerking met prof Faans Steyn verander om 'n meer statisties kontroleerbaar, 'n roepingsverantwoordbare asook 'n gebruikersvriendeliker profiel van getalle in die Gereformeerde Kerke weer te gee (vgl Opdrag 1.1.6).
- 2.1.7 Administratiewe inligting is meer vaartbelyn gemaak (vgl Opdrag 1.1.7).
- 2.1.8 Die kategorie "opgeneem" is verdeel tussen "opgeneem uit ander kerke" en "opgeneem na evangelisasie" (vgl. Opdrag 1.1.8).
- 2.1.9 Die publisering van dagstukkies vir die tiener-, studente- en werkende jeug is ondersoek. Die boekemark is tans oorweldig met publikasie gerig op die tiener en werkende jongmense. Die Deputate het besluit om in die publisering van dagstukkies in die Almanak wel hieraan aandag te skenk deur teologiese studente te versoek om 'n aantal dagstukkies te skryf. In die Almanak 2008 is daar 'n maand afgestaan aan die jeug (vgl Opdrag 1.1.9).
- 2.2 *Neem 'n besluit oor die opgehoopde fondse met inagneming van die volgende aanbeveling van die Deputate:*
- 2.2.1 Die Sinode oorweeg dit om aan die nuwe Deputate 'n bufferbedrag van ongeveer R80 000 beskikbaar te stel om verdere verhogings te kan absorbeer en sodoende die verkoopprijs van die *Almanak* so laag as moontlik te hou en om die gehalte steeds te verbeter.
- 2.2.2 Die oplaag van die *Almanak* was vir 2007: 16 000 eksemplare, vir 2008 was dit 15 000 en vir 2009 word 'n oplaag van 18 000 beplan. Omdat die projek so geseënd is, het die Deputate 'n aantal eksemplare aan Gereformeerde instellings soos ouetehuse en kinderhuse gratis beskikbaar gestel. Die indruk wat die Deputate het, is dat Kerkrade meer geredelik al die *Almanakke* wat hulle bestel van die hand sit en dat dit nie in konsistories ophoop nie.
- 2.2.3 Die Deputate is dankbaar om te rapporteer dat na die drie jaar 'n goeie wins getoon kan word soos blyk uit die Finansiële state wat aan die Sinode beskikbaar gestel is. Die Deputate was in die lig van die finansiële situasie daartoe in staat om die prys van die *Almanak* vir die laaste twee uitgawes laag te hou, waarvoor ons baie dankbaar is.
- 2.2.4 'n Bedrag van R500 000 is na die Dankbaarheidsfonds oorgeplaas na oorlegpleging met die Bestuur van die Administratiewe Buro.
- 2.3 Die Deputate se beleid is om al die inligting wat beskikbaar is van al drie die Sinodes van die Gereformeerde Kerke in die *Almanak* te plaas. Ongelukkig moet ons rapporteer dat die inligting nie volledig is nie.
- 2.4 Dit is die beleid van die Deputate om jaarliks huldeblyke van predikante wat oorlede is, te plaas.
- 2.5 Die Deputate plaas van tyd tot tyd 'n volledige lys van "Kerke en hulle predikante". Sodanige lys is weer volledig in die 2008 uitgawe van die *Almanak* geplaas.
- 2.6 Die Deputate poog om die standaard van die *Almanak* jaarliks te verbeter sodat dit 'n uitgawe sal wees waarop alle lidmate trots is. Ons wil verskeie lidmate en predikante bedank vir insette en wenke wat hulle vrymoedig na elke publikasie aan ons deurgee om ons daartoe in staat te stel.

- 2.7 'n Rubriek in elke uitgawe van die *Almanak* is die Ruit waaraan 'n groot aantal lidmate deelneem. Die Deputate bedank ds Hennie van Wyk wat hierdie rubriek behartig.
- 2.8 Die *Almanak* is jaarliks by die Partikuliere Sinodes afgelewer vir verdere verspreiding deur die onderskeie kerke. Die Deputate maak ook gebruik van posversendings vir verafgeleë bestemmings wat moeilik met padvervoer bereik kan word.
- 2.9 Die Deputate wil hulle dank uitspreek teenoor adverteerders wat in die *Almanak* adverteer om sodoende koste te beperk.
- 2.10 Die Deputate wil graag hulle dank uitspreek teenoor die personeel van die Administratiewe Buro en by name srs Wymie du Plessis, Petro Kroeze en Joey Fourie, sowel as broeder Hannes Vorster vir die insette wat hulle maak om elke jaar die *Almanak* die lig te laat sien.
- 2.11 Ons wil ook graag vir Angie Mphata en Anna Leeuw bedank vir hulle hulp om die versending van die *Almanak* moontlik te maak.

Besluit: Kennis geneem van 2.1 tot 2.11. Die Sinode bedank die Deputate vir die Uitgee van die Almanak, die personeel van die Administratiewe Buro (soos genoem in 2.10 en 2.11) asook alle ander medewerkers van die *Almanak* vir 'n spog publikasie.

3. Sake waaroor die Sinode moet besluit

- 3.1 Die *Almanak* word weer uitgegee en 'n redaksie moet aangewys word (*Indien moontlik, moet die Redakteur een van Potchefstroom se predikante wees*) met die opdrag om:
 - 3.1.1 Die *Almanak* met dagstukkies uit te gee.

Besluit: Goedgekeur.

4. Opdragte van Sinode aan die Deputate

- 4.1 Die lettergrootte wat vir die Dagstukkies gebruik word, in die toekoms groot genoeg sal wees om gemaklik deur ouer lesers gelees te word (die lettergrootte van 2007 se Almanak kan as riglyn gebruik word).
- 4.2 Die Deputate gee steeds aandag aan dagstukkies vir tieners en naskoolse jeug.
- 4.3 Die Deputate poog om die GPS koördinate by die straatadres van elke kerkgebou te gee.
- 4.4 Die Deputate in samewerking met die Deputate Korrespondensie van elke Klassis, besondere moeite doen om statistiese inligting van alle kerke jaarliks op te dateer.
- 4.5 'n Verteenwoordiger uit die kerke van die vorige Sinode Middellande en Klassis Capricorn by die Deputate vir die Uitgee van die Almanak gevoeg word om saam met die Deputate te besin oor hoe die *Almanak* vir lidmate van daardie kerke toeganklik gemaak kan word.

Besluit: Goedgekeur.